



Kamis, 03 Noveber 2022
Ogen : Daniel 5:10-12



"Nande"



Erjuang guna kiniulin e me perukuren ras perayaken sekalak nande. Malem atena adi anakna ndatken kemalemen ate, tapi gulut ukurna adi idahna anakna bas ukur gulut. Enda me biak si la terpersirangken bas nande.

Renungenta wari enda nuriken kerna perbahanen nande raja Belsasar. Mbages penandaina kerna anakna, e maka sora gejek siibahan raja (anakna) minter ietehna maka lit sada perbeben bas raja. Lagu langkah raja e la bagi semalana, uga pa pe lit si la jore atena. Ambah si e arah natap ayo anakna minter ietehna serbut tangkelen anakna e. La pe ibelaskenna tapi igejapkenna isi pusuh anakna. Nande e la banci sinik, minter ioratkenna segelah indatken dalam pulah, ituduhina dalam alu mereken pedah man anakna. Ipetetapna me ukur anak e bas kerina perbeben si langa terdungu anak e. Iturikenna maka lit me mbarenda sekalak si enggo nampati perbulangenna (bapa raja Belsasar); bas ia lit kesah Dibata Si Badia, pentar, pengertin, cerdas, beluh ngertiken nipi, njabab kuning-kuningen ras nerangken rahasia-rahasia. Gelarna Beltasar (Daniel). Sienda kerina ituriken nande e man anakna alu tujun segelah anak e la picet ukurna.

Bage me nande, kekelengenna si la erbaleng nandangi anak-anakna, tetap rusaha mereken ketenengen man anak-anakna. Malem kel ateta maka i jadikan Dibata kita jadi nande, si usur ngukurken kiniulin se isi jabu. Perbulangen ras anak-anak jadi prioritas man banta. Nggit erkorban segelah kedamen ras kemalemen ate jadi i bas perbulangen ras anak. Malem dengen damelah perbulangen ras anak-anakta natap kerina si mehuli silakoken kita.